

SARS e lemosa ka dikema tsa pusetso tsa boqhekanyetsi

Tshwane, 8 Tshitwe 2021 - Ditshebeletso tsa Lekgetho tsa Afrika Borwa (SARS) di hlokometse diketso tse mmalwa tseo ho tsona ho fetolwang diprofaele tsa ditsebi tsa lekgetho le / tsa balefalekgetho ka tsela e sa dumellwang le ya boqhekanyetsi ka sepheo sa ho qhekanyetsa SARS mmho le balefalekgetho bana ba amehang.

Diketsahalo tsena tsa boqhekanyetsi di etswa ke batho ba fumanang phihlello ya diprofaele tsena tsa eFiling ka boqhekanyetsi ba inthanete mmoho le ka diketso tse ding tse soto ho fetola dintlha tse molaong tsa molefalekgetho mme ka mora moo ba fapose dipusetso. Batho bana ba boela ba fana ka dikgutliso tsa lekgetho tsa mokunyata ho iketsetsa dipusetso.

SARS e nka mehato yohle e hlokehang ho lwantshana le ditlolo tsena tsa molao mekgwatshebetso ya rona ya lesedi mme ha ho bopaki ba hore mekgwatshebetso ena ya rona e nonyeditse, bonneteng e dutse e ntse e sireletsehile.

Bekeng e fetileng ho phethahaditswe diphetoho tse mmalwa ka sepheo sa ho ntlafatsa botshepehi ba mekgwatshebetso ya SARS. Diphetoho tsena di akaretsa motjha wa ho eletsa ditsebi tsa lekgetho ha phihlello ya bona ya diprofaele tsa balefalekgetho/ditlelaente tsa bona di tloswa mmoho le motjha o ntlafaditsweng wa ngodiso ya lekgetho la lekeno la batho ka bomong le wa eFiling, hara tse ding. Tsena tsohle di entswe ka sepheo sa ho thatafalletsa dinokwane ho fihlella lesedi le hlokolosi le ho etsa boqhekanyetsi.

Ho sireletsa diprofaele tsa eFiling, ditsebi tsa lekgetho di koptjwa ho netefatsa hore dintlha tsa diprofaele ha di aroleanwe ka hara tshebetso ya tsona kapa dikhampani. Phihlello yohle ya tshebediso ya eFiling kapa ya dikhampani e tlameha ho lekolwa botjha kgafetsa mme moo ho hlokehang, phihlello ya mosebetsi e kginwe, haholoholo moo mosebetsi a tlohelang mosebetsi kapa khampani teng. Kamehla setjhaba se eletswa ho dula se fadimehetse dikema tse batlang karolelano ka lesedi le hlokolosi mmoho le dintlha tsa banka.

Diketso tsa boqhekanyetsi kapa tsa diphetoho tse sa dumellwang tsa diprofaele tsa eFiling di ka tlalehwa ho *SARS Anti-Corruption and Fraud Hotline* ho 0800 00 2870. Balefalekgetho le ditsebi tsa lekgetho ba koptjwa hore ba se sebedise marangrang a tsa dipuisano a kang *Facebook*, ho tlaleha diketsahalo tse jwalo kapa hona ho fana ka lesedi le hlokolosi.

Khomishenara ya SARS Mong. Edward Kieswetter o rometse molaetsa o matla ho baqhekanyetsi bana ba etsang diketso tsa bonokwane bo qhekanyetsang balefalekgetho ba tshepehang. O itse, "Ha ke batle hore ho be le qeaeo ya hore SARS e na le matla le bokgoni ba ho lwantshana ka matla a maholo le bao ba

lomahantseng meno ho etsa diketsahalo tse na tsa bonokwane. Ka tshebedisano le diakgente tse ding tsa phethahatso ya molao, SARS e ka se lobe letho ho tsomana le ho qhauta dinokwane tse na. Ena ha se puo feela, le se le lemositswe"

Ho fumana lesedi le fetang lena, ka kopo ikopanye le SARSMedia@sars.gov.za